

նոյն վանքը և ինչ պարագաներու տակ: (Նոյն վերա-
չինութեան յիշատակարանը և ուրիշ մանրամասնու-
թիւնները տեսնել Հ. Վ. Ե. էջ 6-12):

Ս. Եղիայի վանքը. — Այս վանքը նախապէս կը
վերաբերէր Վրացիներու, իսկ այժմ Յունաց սեպհա-
կանութիւն է: Նոյն վանքին մօտ, ճանապարհին աջ
կողմը ցոյց կը տրուի այն ժայռը որուն վրայ Եղիա
մարգարէն Յեզաբելէն փախչելով հոս եկած էր հան-
գիստ գտնել, երբ Տիրոջ հրեշտակը արթնցուց զանիկա
ու հաց և ջուր ներկայացուց անոր՝ որպէսզի կարե-
նայ իր ճամբան շարունակել մինչև Քորեբ: Այս ա-
ւանդութեան մասին կը թուի թէ Փոկաս տեղեկութիւն
չունի: Ոմանք կը տեղեկացնեն թէ այս տեղւոյն մօ-
տերը եկեղեցի մը կար յանուն Ամբակում մարգա-
րէին, բայց աւելի նոր կը թուի այս աւանդութիւնը:
Ս. Եղիայի վանքը Երուսաղէմ-Բեթղեհէմ ճանապար-
հին կէսն է. մօտի բլուրէն երկու քաղաքներն ալ կը
տեսնուին (Bar. gd. էջ 208):

Կայ նաև ուրիշ աւանդութիւն մը որմէ կը հաս-
կըցուի թէ Ս. Եղիայի եկեղեցիին առջև կար նուի-
րական քարաժայռ մը ուր սուրբ Ընտանիքը պահը-
տած էր Եզիպտոս փախչելու ժամանակ (P. E. F. 1893,
էջ 204):

Մինչեւ 1720 կը պատմուի թէ այս եկեղեցիին
դուրսի կողմը կը գտնուէր ջուրի զէպիլ մը՝ ուրկէ
ճամբորդները ջուր կը խմէին: Անոր մօտ կար նաև
ձիթենի մը և անոր ներքեւը տակաւին կ'երևէր փո-
սածն յիմ մը և կ'աւանդուի թէ հոս է որ Եղիա մար-
գարէն հանգիստ ըրած է (Հան. էջ 284):

Սիսեռնետու առջը. — Ս. Եղիայի վանքէն մեկնե-